

Indesch Rumantschins termaglian en la canorta

La purschida a Turitg è probabel l'emprima da quest gener en la Bassa

DA CLAUDIA CADRUVI / ANR

■ **Mintga glindesdi avra la canorta rumantscha sias portas per ils pitschens rumantschs da Turitg. Ils indesch plazs èn stads occupads ils ultims trais mais. Ils geniturs beneventassan sche la canorta schlargiass sia purschida e fiss averta dus dis.** Avant biabain dus onns han tschintg babs gi l'idea. Per propi organisar tut hai lura duvrà in onn. Ils babs han fundà l'uniun Canorta rumantscha Turitg sco purtadra. L'uniun ha motivà anc autras famiglias da tarmetter ils uffants en la canorta. Ins ha rimnà daners. E cun la fundaziun GFZ han ins la finala chattà in'organisaziun cun experientscha che ha surpiglià il manaschi. Uss exista la canorta dapi passa in onn. Igl è probabel l'emprima ch'ins ha mess en pe en la Bassa.

Avrir dus dis?

«Per il mument avain nus cuntanschi in'occupaziun cumplaina», di Remo Pfister, il president da l'uniun. El è dentant precaut e fa attent ch'i dat savens midadas en ina canorta, per exempel sch'ina famiglia mida domicil u

sch'ils uffants pli vegls van a scolina. Uschia vegnan l'avust puspè liber dus plaz. L'uniun saja cuntenta sch'i dettia novas annunzias. Fin uss hajan ins avert la canorta mo il glindesdi. «La finamira è da schlargiar la purschida, sche nus survegnin personal qualifitgà

per dapli dis», di Pfister. L'uniun haja fatg ina pitschna retschertga tar ils geniturs e commembers ed il resun saja stà positiv. Fin uss lavurian trais educaturas rumantschas per la canorta. Per porscher in segund di duvrassi ina quarta persuna.



«Cucu!» Far termagls en ina stgatl da chartuna plascha sa chapescha era als uffants da la canorta rumantscha.

FOTO C.CADRUVI

GFZ tschertga educatura

La fundaziun GFZ – pli baud il «Gemeinnütziger Frauenverein Zürich» – s'engascha gia dapi passa tschient onns per famiglias ed uffants e maina da preschent 13 canortas per passa 1600 uffants. La canorta rumantscha ha chattà albiert tar il GFZ en il Zeltweg gist davos la staziun Stadelhofen. Fin uss èn s'occupadas trais educaturas: duas discurren sursilvan ed ina ladin. Uss datti ina midada ed il GFZ ha scrit ora ina piazza d'almain 20 pertschient per in'educatura rumantscha che po tenor inserat ev. anc lavurar dapli en autras partiziuns dal GFZ.

In di da famiglia ils 27 d'avust

La fin d'avust organischa l'uniun in di da famiglia tant per ils agens commembers sco era per interessents che lessan savoir dapli da la canorta. Ils 27 d'avust a partir da las 11.00 s'entaupan las famiglias en il GZ Schindlergut, nua ch'i dat la chaschun da termagliar ora en il parc u era endadens.

Dapli infurmaziuns: www.canortarumantscha.ch

Anc betg reussi a Lucerna

Ch'i grategia da far marschar ina canorta rumantscha na sa chapescha insumma betg da sasez. Sper in grond engaschi giogan plirs facturs ina rolla. I dovra avunda daners, avunda uffants, localitads adattadas, educaturas qualifitgadas che san bain rumantsch etc. Il 2015 hai dà in'emprova per in «Rudi d'affons Lucerna». Las duas iniziantas, omaduas dunnas dal fatg en la tgira d'uffants sco en il sector social, han repartì in flyer: «Nus essan giuvnas rumantschas motivadas da mantegnair noss linguatg unic.» En il rudé duevan ils uffants avair la pussaivladad da sa barattar in cun l'auter e da sviluppar la lingua a moda ludica. L'emprim n'han las iniziantas betg pudì realisar il rudé per mancanza d'annunzias. Suentar è ina dad ellas daventada mamma ed ins ha spustà ils plans.